

19.06.2014.

U ovom gradu djeluju kompanije koje rade za BMW, VW, Mercedes, Jaguar, a broj njihovih uposlenika stalno raste.



Piše: Ibrahim Sofić

GORAŽDE - Veliki broj nezaposlenih u zavodima za zapošljavanje Bosne i Hercegovine, manjak kada se govori o odnosu uvoza i izvoza ove države i nedostatak planova za razvoj samo su neki od pojmova koji se mogu skoro svakodnevno čuti u Bosni i Hercegovini.

No, jedan od svijetlih primjera bh. privrede, rada i napretka je Bosansko-podrinjski kanton i sam grad Goražde. Poput mnogih dijelova Bosne i Hercegovine, ovaj grad na Drini je bio žestoko pogođen ratom i poratnim dešavanjima u posljednjoj deceniji 20. vijeka, da bi sa novim milenijem počeo i razvoj ovog dijela Bosne i Hercegovine.

Kako navode iz Privredne komore BPK-a, Goražde se nalazi u samom vrhu kako države, tako i bh. entiteta Federacija Bosne i Hercegovine po stopi vanjskotrgovinske razmjene.

ALAT OD 19,5 TONA ZA CADILLAC

Posljednji projekat Bektine alatnice je jedinstveni alat za renomirani Cadillac, a posebnu važnost ima činjenica da je taj alat težak 19,5 tona.

„Prvi put je u Bekti urađen ovakav alat, napravljen na sastavljanje i iz prve 'pogođen', da su sve mjere 100 posto tačne na testiranju. Ovakav alat je prvi put napravljen na Balkanu, a mi nemamo tolike mašine. Suština je u kreativnom rješenju kojim je alat napravljen na mašinama koje nisu tih gabarita“, navodi Ćoralić.

"U prvom kvartalu 2014. godine sa područja BPK-a izvezeno je 39.907.000 konvertibilnih maraka (blizu 20 miliona eura), što je u odnosu na isti period 2013. godine više za 34 posto. Rast izvoza praćen je rastom uvoza, tako da je na područje BPK-a u posmatranom periodu uvezeno ukupno 31.118.000 KM (blizu 16 miliona eura) roba i usluga i isti je povećan za 44,56 posto", kažu iz Komore.

Kriza kao šansa

Jedna od poznatijih kompanija koje djeluju na ovom području, a koja je krenula od nule, jeste [B ekto Preciza](#)

. Ova firma je s radom počela prije devet godina sa osam uposlenika. Sada ih ima skoro 460, no impozantniji je spisak njihovih klijenata.

Među klijentima se nalaze brojni giganti autoindustrije, poput BMW-a, Mercedesa, Audiya, Jaguara, Bugattija, Land Rovera... Iz Bekto Precize ističu kako se stalno dešava prijem novih ljudi, koji se razvija planski, prema profilima potrebnim usljed povećanja obima proizvodnje.

"Pogoni Bekto Precize nalaze se na blizu 50.000 kvadratnih metara. Imamo više od 310 različitih mašina, najnovijih, koje su uopšte prisutne u ovoj branši. Fenomen Bekto Precize ogleda se u onom stavu kako je kriza šansa, jer smo mi postigli najbolje rezultate u vrijeme krize", ističe PR kompanije Mensur Brdar, te dodaje kako kompanija iz Goražda neće prestati sa širenjem i jačanjem.

"Trend razvoja će se nastaviti i u narednih najmanje pet godina, s obzirom na dogovorene i zaključene ugovore."

Najznačajniji segment rada je proizvodnja industrijskih alata. Posebno su koncentrirani na rad u automobilske industrije, a Bekto Preciza posjeduje sve neophodne certifikate Evropske unije.

"Ova vrsta djelatnosti ne može funkcionisati bez certifikata na ovom nivou na kojem smo mi. Ovakvih alatnica ima svega nekoliko u Evropi. U autoindustriji su najstrožiji uslovi i standardi", kažu iz Bekto Precize.

Nova radna mjesta

Pored ove kompanije, sa značajnim rezultatima i klijentima mogu se pohvaliti i iz firme [Prevent](#) Goražde. Sličnost s Bekto Precizom je činjenica da i Prevent djeluje u autoindustriji, odnosno proizvode presvlake za sjedišta modela Volkswagen, Opel, Ford, Nissan...

"Trenutno je uposlono 1.100 osoba u firmi Prevent Goražde. Još na ovom području djeluju i

Prevent Safety, koja se bavi proizvodnjom zaštitne opreme i rukavica, te Prevent Components, koja radi na proizvodnji profila za autoindustriju", kaže Lejla Ferhatbegović iz uprave kompanije.

U ove tri Prevent firme zaposleno je blizu 1.300 ljudi.

INOVATIVNOST I KREATIVNOST

Pored postojećih proizvoda, Bekto radi i na razvoju novih.

„Najveća snaga firme su inovativnost i kreativnost, koja je ohrabrujuća. Sami smo razvili mnogo proizvoda sa 50-ak inženjera u birou. Jedan od primjera je LED sijalica za kućnu upotrebu. Ona je od 10 vati, mijenja konvencionalnu od 60 vati, životni vijek joj je 50.000 radnih sati, ne može se razbiti i štedi 80 posto struje. Unutar sebe ima termomenadžment koji hladi sijalicu“, navode iz kompanije.

"Planiramo do kraja godine uposliti još najmanje 200 osoba, zbog povećanja obima posla. Radit će se presvlake za sjedišta modela Opel, Mocca i Corsa, te ćemo angažirati blizu 150 šivača, a ostali broj potrebnih ljudi radit će u skladištu ili kao odlagači, kontrolori ili na ručnom radu", kaže Ferhatbegović.

Drugi kontinenti

Obje kompanije u planu imaju proširenje proizvodnje na domaćem terenu, a Bekto Preciza planira proširiti svoje djelovanje i na druge kontinente.

"Imamo tri magistralne stvari u budućnosti, a ima još drugih, manjih. Prvo je fabrika u Vitkovićima na 8,5 hektara, a kako se to bude širilo primat ćemo još ljudi. To je megaprojekt, koji će trajati dugo, a desetak miliona eura već je investirano. Druga stavka je pokretanje proizvodnje u bjeloruskom Gomelu, a kompletna proizvodnja bit će namijenjena za Carinsku uniju, koju čine Bjelorusija, Rusija i Kazahstan.

